

禪關策進序

禪曷為有關乎？道無內外，無出入，而人之為道也有迷悟，於是大知識關吏，不得不時其啓閉，慎其鎖鑰，嚴其勘覈，俾異言服私越度者，無所售其奸。而關之不易透，亦已久矣！予初出家，得一帙於坊間，曰「禪門佛祖綱目」，中所載多古尊宿，自敘其參學時始之難入，中之做工夫，經歷勞苦次第，與終之廓爾神悟，心愛之慕之願學焉。既而此書於他處更不再見，乃續閱五燈諸語錄雜傳，無論緇素，但實參實悟者併入前帙，刪繁取要彙之成編，易名曰「禪關策進」，居則置案，行則攜囊，一覽之則心志激勵，神采煥發，勢自鞭逼前進。或曰是編也，為未過關者設也，已過關者長往矣，將安用之。雖然關之外有重關焉，託偽於雞聲，暫離於虎口，得少為足，是為增上慢人。水未窮，山未盡，警策在手，疾驅而長馳，破最後之幽關，徐而作罷參齋，未晚也。

萬曆二十八年歲次庚子孟春日雲棲株宏識